

24-05-2016

Inatsisartut suleriaasianni § 37 naapertorlugu matumuuna Naalakkersuisunut apeqqutit imaattut saqqummiuppakka:

1)

55 mio koruunit isertinniassagaanni inuit qassit akileraarusersuinikkut allannguiffigineqassappat? Aningaasaqarnermut naalakkersuisoq oqaluuserisassap samminerani aperiganni, akivoq pingajorarterutaasoq. Suup pingajorarterutaa? Naalakkersuisoq ersarissumik akissuteqaqquneqarpoq.

- a) 55 mio. Koruunit isertinniarlugit, inuit qassit akileraarusersorneqassappat soraarnerussutisiassanut akiliutinit akileraarusiinerni?**
- b) Paasisakka naapertorlugit suliffeqarfinni anginerusuni atorfeqartut arlallit soraarnerussutisianut akiliinerminni akileraartareerput. Naalakkersuisut tamanna ilisimavaat? Taakkulu suliffeqarfinni atorfeqartut naatsorsuinerni ilanngaatigineqareerpat? Paasisakka naapertorlugu atorfillit pineqartut Tele A/S-imi Air Greenlandimilu atorfeqarput.**

2)

Soraarnerussutisiassanut akiliutaasut akileraarutigineqarnissaata siuartinnissaanut siunnersuutaasup suliarinerani aningaasatigut iluanaarutaasussat 30 mio. koruuniniit 50 mio. koruuninut maannalu 55 mio. koruuninut amerliartorput. Paasissutissat tunggaviusut suut Naalakkersuisut suliap ingerlanerani pissarsisarimavaat, aallaqqaataaniit ilimagisamiit maanna isertitarissamakanniit 25 mio. koruuninik amerlinerannut?

3)

Naalakkersuisut inuit qassit ilimagivaat nunatsinni soraarnerussutisiaqarnermut suliffeqarfimmuut nuussasut, siusinnerusukkut akileraarnissaq pinaveersaartinniarlugu?

4)

Naalakkersuisut innuttaasut soraarnerussutisiaqalernissamut ileqqaarnissaannut perusulersinniarpaat. Ileqqaakkat ikinneruppata, ernialiissutigineqartoq minnerussiaaq. Taamaalilluni siunnersuut landskarsimut iluaqusiissaaq illua'tungaatigulli innuttaasunut ataasiakkaanut nunani allani ileqqaagaqartunut iluaqutaanaviarnani. Qanoq Naalakkersuisut tamassumunnga oqaaseqaatissaqarpat?

5)

Oqaluuserisassap 21-p aappassaaneerreqarnerani Aningaasaqarnermut Naalakkersuisoq oqarpoq nunanit allaniit nunatsinnut suliar torusussuseqarneq suli piussasoq. Naalakkersuisup siunissami sulisussarsiornerup sapernerulernissaanut ernumassuteqarneq, suliniaqatigiiffinnit arlalinnit saqqummiunneqartoq piviusuunngitsutut nalilerpaa. Naalakkersuisut tunggavilersuutigaat Danmarkimi akileraartarnermut sunniutaasoq sakkortunerunerarlugu. Qanittukkulli nutaarsiassaqarfinni atuarsinnaavarput nunatsinnut nakorsanik

**Naaja H. Nathanielsen
Attaviitsoq / Løsgænger**

atorfinitsitsiniarneq ajornareersoq, akissarsiat atorfeqarnermilu atugassarititaasut nunani allani neqeroorutaasut pitsaanerummata. Naalakkersuisut isumaqatigaat akissarsiatigut ineriartornerup nunarput nunanut allanut sanilliullugu suliffigissallugu pilerinannginnerulersimmagu? Allatulluunniit oqaatigalugu: Peqqinnissaqarfimmi atorfinnik aalajangersimasunik sulisussarsiorneq ajornartorsiutaalereerpa?

6)

Naalakkersuisut arlaleriaqalutik oqaatigereerpaat siusinnerusukkut akileraartarnissamut siunnersuutaasoq 2011-miilli ilisimaneqareersoq, tassami siunnersuut Akileraartarnermut Atugarissaarnermullu Isumalioqatigiissitap nalunaarutigereermagu. Imak paasineqassava,

- a) Akileraartarnermut Atugarissaarnermullu Isumalioqatigiissitap innersuussutai tamaasa Naalakkersuisut malinniarpaat?**
- b) Naalakkersuisut ilimagaat suliniaqatigiiffiit suliffeqarfiillu isumalioqatigiissitap Assigiinngitsut innersuussutaannut ingerlatiinnartumik nalimmassassasut naak naalakkersuinikkut anguniagassanik piviusunik aqqummiussisoqarsimanngikkaluartoq?**
- c) Naalakkersuisut Aalisarneq pillugu isumalioqatigiissitap Aaqqississusseqinnermillu isumalioqatigiissitap innersuussutai tamaasa malinniarpaat?**

7)

Naalakkersuisut innersuussutigaat suliniaqatigiiffinnik attorneqartunik arlaleriaqaluni ataatsimeeqatiginnittoqartarsimasoq, taamaalillutillu akuutinneqartut. Kisianni arlaleriaqaluni ataatsimeeqatiginnittoqarsinnaavoq illua'tungerisaq ilanngutinngikkaluarlugu tusaaniarnagulu. Taamaattumik Naalakkersuisut siunnersuummut allannguutaasunik tigussaasunik toqqaaqqakka, suliniaqatigiiffinnit apeqqusiisunit saqqummiunneqartunik.

Tunngavilersuut

Naalakkersuisut siunnersuuteqarsimapput soraarnerussutisiassanut ileqqaarutaasunut nunani allaniittunut ileqqaarnermi akileraarusiisalernissamik.

Naak amerlasuut isumaqatigiissutigigaluaaraat sapinngsaq naapertorlugu aningaasat nunatsiniiginnartinneqassasut siunnersuutaasoq ajornaatsuinnaangilaq. Tamanna tusarniaaffigineqartunit tikkuarrtorneqarpoq. Ajoraluartumik paasisara unaavoq, tusarniaaffigineqartunit apeqqusiisunik akissuteqaatit Naalakkersuisunit naleqarpiannngitsutut isigineqartut.

Isumagaarattaaq siunnersuutip aningaasaqarnermut iluaqusiinissaanik kingunissai Naalakkersuisunit isumalluarfigineqarpallaartoq. Aningaasaqarnermut Naalakkersuisup oqaluttarfimmiit apeqquteqaatikka akisinnaasimanngilai inatsisartullu suleriaasianni §37 aqqutigalugu allakkatigut apeqquteqaateqaqqullunga. Siunnersuut majip 30ani pingajussaaneernejartussaammata Naalakkersuisut qinnuigissavakka kingusinnerpaamik majip 29-ani apeqqutinnut akissuteqaateqaqqullugit.